

SAN PABLO KARTA GALAKIA KIWESUWE'SX JÏI

Galacia kiwesuwe'sxtxi weçxana fxi'jni

¹ Adxa' Jesukristo jxkaahnisa Pablo yaaseth. Naa kiwete piçthê'jwe'sx adxa's txhitxhçxa jxkaahnisameeth, wejxwa Jesukristo vxite' Dxus kwe'sx Tata na'wê uuniijûwa ki' itxi vxitku txâawe'sx jxkaahnisath. ² Adx vxite' yakthê'jwe'sx ayte üssa txâawe'sx yakh naa karta's fxi'jçxa kajaçthu Kristo nasa Galacia kiwesu pkhaakhena üssawe'sxtxi weçxana. ³ I'kwe'sxtxi' Dxusa' pu'çxhina ewçxáa kaafxi'ze'jna vxite' kwe'sxtxi jxpe'jsa Jesukristo. ⁴ Txâa Jesukristo íik kwe'sx pkaltxi khûkhçxa ewmeejû nwe'weya' peekíi ya'dukhçxa kwe'sx pa'gate uu, Dxus jxthâasniçxá's kxtey yuuna. ⁵ Txâa pa'ga Dxusa's багаçxtewa wala weçxawa'j ji'ptha'w.

Dxus yuwe vxite yu' meea'

⁶ I'kwe'sxa' Kristo nwe'wenijû txaçxmeyna tx-uteeçxa Dxus yuwe vxite fxiy kaapiya'jniçxá's nwêese'jna üsta' jïni's jiyuçxa', adxa' wala kuh yaaki'th. ⁷ Ewte nvxiitwa'jsa Dxus yuwe vxite yu' meea', nawa i'kwe'sxtxi kaypuba'j wêeçxaçxáa maai' yu' Kristo kaapiya'jni's yu'pthehçxa fxiy kaapiya'jna üsta'. ⁸ Nawa kwe'sx pta'sxtha'w txâ'wêmée fxiy kaapiya'jna pa'jatxna Dxus yuwe' jïna aça' txâ'wê yûusatxi' Dxus yuu iiméh

seena' ewmeesata' jĩçxa ivxiituwa'the nvxiitni yuutxna. Meeçxa' adx ma'th fxiy kaapiya'jna pa'j meeçxa' cielujũ kĩisa angel ma'k txã'wẽ fxiy kaapiya'jna pa'j nawa txã'wẽ yũusa yu-utxi' txã'wẽçxaçxáa yuuni yuutxna. ⁹ Na'jĩ'th na': Maawa Dxus yuwe's pta'sxsatha'w jĩçxawa fxiy pta'sxna pa'jatxna kwe'sx kaapiya'tha'w txã'wẽmée aça' txãa nasatxi' Dxus yuu iiméh seena' ewmeesata' jĩçxa ivxiituwa'theçxáa nvxi-itni yuutxna.

¹⁰ Na'wẽth we'we' aça' i'kwe'sxa' peekx mjiyuwe: adxa' naa kiwete piçthẽ'jwe'sx adxa's ew we'we' jxthãasna ũsmeeth, naasáa Dxus kaaũusuthe'jniçxá'sthu áate we'we'. Sa' naa kiwete piçthẽ'jwe'sxtxi weçxaa jxthãasna ũsçxa', Kristona selpiisameeçxa txã'wẽ yu'nja.

Judiu ji'jmée vxite nasatx Dxus yuwe's pta'sxsa Pablo

¹¹ Yakthẽ'jwe'sx mjiyuwe: Na'wẽ Dxus yuwe ewte nvxiitwa'jsa's pta'sxi'th txã' piçthẽ'jwe'sx ũus yajkçxa kaapiya'jnisame'. ¹² Txã'sa' adxa's naa kiwete piçthẽ'jwe'sx ũsmeeta', naasáa Jesukristo yuuçxáak kaajiyu'j.

¹³ I'kwe'sxa' jiiyã'jne'kwe adxa' nyafxí' judi-uwe'sx jxkaahni's nwẽese'jna ũsçxa', ma'wẽtka fxi'ze', sa' ma'wẽtka seena' juuna' yuuna Kristo nasatx ahçe ivxiituya' sũhçxa. ¹⁴ Adxa' judiuwe'sx jxkaahni leya's kĩhte yuhwa pee-jxmée jxukath kxtey yuuna ũssa yu', adx ja'dawe'sx ũsu'tx txãawe'sxte jxthaakwe. Sa' adx yaçgawe'sx kaapiya'jni's adxçxáath iiméh ew kxtey yuusa yu'. ¹⁵ Txã'wẽ açesatewa, Dxusa'

adxa's iiméh wala peeygãhçxa, mama tutx-huh kasehmeyna txhitxhçxa nvxiitnisa ne'tka yu'. ¹⁶ Txãasak txajx Nçxi'ka's jiyuwa'j en ãhte', adxa's pa'yaçxa kaajiyu'j txã'wē txajx yuwe ewte nvxiitwa'jsa's judiu j'i'jmée vxite nasatx pta'sxkahn. Aça' adxa' maa yuhtxwa paapējxya' u'jmeeth. ¹⁷ Jerusalente Jesukristo jxkaahnisawe'sx ũsu'tx txãawe'sxçxáa yuhtxwa thegya' u'jmeeth. Txã'wē yūupkaçxte wejxwa Arabia kiwenthu u'j, sa' txãa e'su sxawedçxa' Damaskonthu u'j.

¹⁸ Sa' tekx anxu skhēwnijūth Jerusalenna u'j, txãasath Pedro's jiyu, sa' kxtee ũsu'th txãa yakh e'z ki'su ãhpkaçx. ¹⁹ Nawa Jesukristo jxkaahnisawe'sx vxite yu' jwee yu' uymeeth, naasáa Jesukristo nyakh Jakoboçxá'sthu uy. ²⁰ Dxus dxi'pte isath we'we', na'wē kim yuhtxwa paapējxmeeth jīna fxi'jaçthi txã' ĩsxiinisame'.

²¹ Txãa e'su' Siria vxite' Cilicia kiwenthu u'j. ²² Aça' Kristo nasa Judea kiwesu ũsta' txãawe'sxa' adx yu'sa' iuymeeta', ²³ naasáa na'jīniçxá'stxi wēse'j: Kwe'sxtxi ahçeçxa ivxi-itu wēesaçxawa, ãçxha' Kristo's jxpa'gawaja's pta'sxna u'ju' jīni'stxi wēse'j. ²⁴ Txã'wē wēse'jçxa', Dxusa's wala weçxatx adx txã'wē yūupa'ga.

2

¹ Katorce anxu skhēwnijū' ki' u'th Jerusalenna, Bernabé vxite' Tito txãawe'sxtxi pe'jçxa.

² Txã'wē u'jwa'ja's Dxusku pta'sx txãa pa'gath adxa' u'j. Sa' kxtee Jerusalente jxkaahsawe'sxta' jīni ũsu'tx txãawe'sx yakh

dudte pkhaakheçxa txãawe'sxtxi pta'sxthu na'wē judiu ji'jmée vxite nasatx kaapiya'ja'th Dxus yuwe ewte nvxiitwa'jsa's txã'sna. Txã'wēth pta'sx, txã'wēme' adx mjīini' ewmeek yu' jīwe'sxte. ³ Nawa Tito adx yakh kxtee ūsu'k txã'sçxáa yuhnawa kaacirkuncidaĩ'jmeeta', txã' judiu meek yu' na'swa. ⁴ Txã'wētewa txãa entey kwe'sx ksxavxyte u'katx kwe'sxwa yakhthē'jwe'sxtha'w jīna īsxiisa. Txãawe'sx yu' Tito's kaacirkuncidaĩ'j wēetx. Kwe'sx txã'wē yūumeeçxawa, Kristo Jesus yakh kwe'sx ew fxi'zeni's suw wēeçxatx peethegu'jya' u'ka, judiuwe'sx fxi'zenitey kaasxwedu'j wēeçxa. ⁵ Txã'wētewa, weh yuhwa txãawe'sx we'weni's kxtey yuumeetha'w, txã'wē Dxus yuwe isa pta'sxniçxá's i'kwe'sx nwēese'jna nes yuukahnthaw txãawe'sx we'weni's kxtey yuumée.

⁶ Kwe'sx txã'wē nwēese'jmeetewa, yakhthē'jwe'sx jxkaahsawe'sxa' adxa's kaapiya'jwa'j fxiy yu' kīh yuhwa yu'kxpehmeeta'. Makwe txãawe'sxa' walasa ne'ta yu', nawa adxa' txāatxi' thegu ji'phmeeth, txãa pa'gatey Dxus dxi'pte' maa yuhwa walasamée teeçxsa na'wēçxaçxáatha'w naa pa'ga. ⁷ Txã'wē kaapiya'jwa'ja's fxiy yu'kxpehna pta'sxipkaçxte, wejxwa txãawe'sxa' jiyutx Dxus yuh idxa's kaahne', txajx yuwe ewsa's judiu ji'jmée vxite nasatxwa pta'sxkahn. Pedronawa ma'wēga judiu ji'jçxáatx pta'sxwa'jsa nvxiht, txã'wēy ne' idxa's vxite nasatx pta'sxwa'jsa nvxiht jīnaçxáatx we'we. ⁸ Txãa pa'gatey judiuwe'sxçxáatx pta'sxwa'jsa Pedrona kaahsa Dxus íçxáak

adxnawa kaah judiu ji'jmée vxite nasaa ksxavxysu.

⁹ Txajíiçxáatx Jakobo, Pedro vxite' Juan txãawe'sxa' walasata' jñisaçxawa, kwe'sxtxi'sa' ma'jímée Dxus ne' txã'wě i'kwe'sxtxi's mjiiwa'jsa nvxiht jĩçxa weçxana kuse ũstxi adxna vxite' Bernabewe'sxtxi na'jĩna: I'kwe'sxa' judiu ji'jmée vxite nasa yakh mjiine'kwe, naapkaçxha' kwe'sxa' judiu ji'j yakhçxáa mji'nja'w jĩçxatx txã'wě kuse ũs. ¹⁰ Naasáa yakhthě'jwe'sx kĩhwa ji'phmée peejiina fxi'zesa yuutxi' pu'çxwa'ja's peçxkanamée yajkxna fxi'zene'kwe jinaçxáatx neewe'we, aça' txã'sa' wala jxpa'yakx kxtey yu'th.

Ewte neeyũuya' judiuwe'sxwa Kristo's ũuste jxpa'gawa'ja'

¹¹ Txã'wě Pedro' walasa' jñisatewa, adxa' txã'sa' wala juuna' we'weth, Antiokíate pa'jçxa' ewmeek yũuna ũsu' naa pa'ga.

¹² Pedro' Antiokíate ũsçxa', Jerusalenu Jakobo kaahnisawe'sx pa'jmeyna yu' judiu ji'jmée vxite nasa yakh pkhaakheçxa txãawe'sx yakh wa'lmeek ũ'we'. Nawa Jerusalenuwe'sx pa'jyã'the', txuteeçxa pkhaakheme', txajx ji'j cirkuncidãynisawe'sxtxi ũukhçxak txã'wě yũu.

¹³ Aça' judiu ji'j Dxusna jiisa ũsu'tx txãawe'sxwa Pedro na'wěytxi yũu. Txãa pa'ga Bernabé yuhwa Pedrowe'sx yakhku utxáa. ¹⁴ Dxus

yuwe ewte nvxiitwa'jsa' txã'wě jxkaaja'çme' na's txã'wě fxiy yuuçte', adxa' Pedro's wala juuna' we'weth pkhaakhesawe'sx ksxavxyte na'jĩna: Idxa' judiuçxawa, ayte ũsçxa' vxite pa'jmeyna

yu' judiu na'wēmeeg fxi'ze. Nawa āçxh vxite pa'the yu', çkĩjxa'ga judiu ji'jmée vxite nasa yakha' utxaawa'jme' jīsa na'wē yu'?

¹⁵ Kwe'sxa' mama tutxhuh kasejīi judiu ji'tha'w yu', sa' Dxusna jiimeesa ji'j yu'çmeetha'w.

¹⁶ Makwe judiu ji'jçxawa, Moises leya'sçxáa yajkxte', maa yuhwa yuuwemée ewsa ya'yu'çme', naasáa Jesukristo's ũuste jxpa'gate yuuçxáak yuuwemeesa ewte ya'neeyũ'. Txajīiçxáatha'w kwe'sxa' judiuçxawa, yuuwemée ewte neeyũuya' sũhçxa Jesukristo's ũusuh jxuka yajkxçxa jxpa'ga, txã'wē ley jxkaahni yakha' yuuwemée ewte ya'neeyũ'çme' naa pa'ga. Aça' leya's yaakxsa' naa kiwete kim yuhwa yuuwemée ewte neeyũuwa'jsameeta'.

¹⁷ Txãasa ew yajkxte yu', makwe judiuçxawa yuuwemeesa yuuya' Kristo's ũuste jxpa'gameeçxa yu', pkalsaíiçxáa ne'tka'w. Txã'jīte', leya's nvxihtçxa Kristoçxá's jxpa'gaçxa ne'tka'w yuuwe pkalsa yuu sũjuwá'kwe. Weh yuhwa txã'wēme'. ¹⁸ Moises leya's

nwēese'jmeete ewna jĩçxawa, e'su ki' we'weçxa': Pejka nwēese'the ewna jīna we'wesa txã'wē yuuwesa yuuna. ¹⁹ Adxa'

Moises leya's nvxihtçxawa ki' nwēese'jçxa' yuuwesa yuuya'mée txãa ley yakha' uusáa na'wēth yuu, Dxusçxáana nwēese'jya'.

²⁰ Adxa' leya's nwēese'jya'mée Dxus yakhçxáa fxi'zeyá', Kristo yakh ja'da uusáa na'wēth yuu, Txãasa āçxh ĩtxi fxi'ze'th txã' adx jīime', adxna ĩtxi kaafxi'ze'jsa Kristo jī'. Txãasath naa kakwe yakh ĩtxi fxi'ze'ççxawa, na'wē Dxus Nçxi'k adxna

peeygâhçxa peekíi ya'dukhçxa uuk adx pa'gate txãa yakh yuuçxáa fxi'ze'. ²¹ Txãa pa'ga Dvus peeygâhçxa ewte nvxiitni's weeçx wêemeeth. Txã'wê leya's nwêese'pha'gaçxáa yuuwemée ewte neeyûuwaça', Kristo uuni' kxulne' yuuwa'j yu'. Nawa txã'wê yuume'.

3

Leypa'ga Dvus Espiritu's ya'jypa'ga'çme'

¹ Galacia kiwesuwe'sx, wala yuh jiimeesa yuui'kwe. I'kwe'sxtxi' ¿kimga txakwe wala ísxii açkwe Dvus yuwe isasa's nvxiht? I'kwe'sx txã'wê yuukahmeníi tha'w kwe'sxa' áate pta'sx Jesukristo kluuskhê uusáa kimtewa. ² Mpeeta'sxwe: I'kwe'sxa' ¿Moises ley jxkaahni's nwêese'jçxakwe Dvus Espiritu's jxpa'ga? Meeçxa' ¿kwe'sx pta'sxni's nwêese'jçxakwe Dvus Espiritu's jxpa'ga? ³ I'kwe'sxa' pejka txakwe yu' wala jxpubawa'jmeetena Dvus Espiritu i'kwe'sx ũuste pu'çxya' takhni's ¿ma'wê i'kwe'sx kakweju pa'pçxuçxa Dvus Espiritu takhni's jxã'jaki'kwe? ⁴ Dvus yuwe's wêese'pha'ga nakwe wala pkxuuni yuui'kwe nawa Dvus yuwe isa pta'sxni's nvxihtçxa', kxulteçxáa pkxuunisa yuune'kwe. Txakwe kxulteçxáa yu' pkxuuni yuumeewaç wejx ewna. ⁵ Dvusa' txajx Espiritu's ũsçxa', kim yuhwa ájanimeesa's kījkihwa kaavxya'ja'ja'k i'kwe'sxtxi ew jiyukahn pu'çxna sa' ¿ley jxkaahni's kxtey yuupa'gaga txã'wê yuua'á? Meeçxa' ¿kwe'sx pta'sxni' isasa yuhna sũhna jxpa'gate wá' txã'wê yuu?

Abrahan yakh Dxus puutx we'weni

⁶ Abrahana's miiyajkxwe: Txã' ũusuh yuuçxáak Dxusa's jxuka yajkxna nwēese'j. Aça' txã'wē yūuteçxáa Dxusa' Abrahana's yuuwemée ewsak vxit. ⁷ Txãa pa'ga i'kwe'sxa' mjiyuwe: Dxusa's ũusuh yuuçxáa jxuka yajkxna nwēese'jsa yuuçxáa Abrahan ji'j yuutxna. ⁸ Txã'wē judiu ji'jmée vxite nasawa Dxusa's ũusuh jxuka yajkxna nwēese'theçxáa txãawe'sxtxiwa yuuwemée ewsa vxitwa'ja's dxiikhēy pta'sxnik yuu Abrahana's na'jīna: Maa nasawa jxuka ewsa yuutxna iidxpaga yuuçxáa jī'k Dxus librute. ⁹ Txãa pa'ga maawa Dxusa's ũusuh yuuçxáa yajkxçxa nwēese'jsa' Abrahan na'wēy yuuwemée ewsata' açxwe'sxwa.

¹⁰ Aça' Moises ley jxkaaja'k txã'sçxáana kxtey yuusa': Iiméh seena' ewmeesata' jīna Dxus yuu we'weçxa', ivxiituwa'the nvxiitni ũsta'. Txajīik Moises ley íiwa na'wē we'we': Maawa ley jxkaahnitx jxuka kxtey yuusame', ivxiituwa'the nvxiitni yuutxna jī'k. ¹¹ Aça' txã'wē leya'sçxáa nwēese'jsa' kim yuhwa Dxus dxi'pte yuuwemée ewsa yu' meeta'. Txajīik áate na'wē pta'sxi' Dxus librute': Dxusa's ũusuh jxuka yajkxteçxáa Dxus dxi'pte yuuwemeesa yuuwa'ja's ya'ji'phuna jī'k. ¹² Aça' Moises leya' Dxusa's ũusuh yaakxwa'ja's we'weçme'. Txã'wē ũusuh yaakxwa'ja's we'wemeçxa íik na'wēçxáa we'we': Maawa jxkaahna fxi'jçxa nvxiitnisaçxáatx jxuka kxtey nwēese'jwa'ja' ítxi fxi'zeyá' jī'k.

¹³ Txã'wē leya's jxukamée nwēese'pha'ga

iiméh seena' yuuwesatha'w yu', txãa pa'ga Kristok kwe'sx iiméh seena' yuuwesa pa'gate uu, ley kastigãyni kwe'sxtxi nwe'weya'. Txã'wẽ iiméh seena' yuuwesa's kastigãyni uuwa'ja's na'wẽk pta'sxi' Dxus librute: Iiméh seena' yuuwesa's maawa fxtũukhẽ a'kxçxa ikhni yu-una jĩ'k. ¹⁴ Txã'wẽ Kristo Jesus kwe'sx pa'gate uupa'gatha'w judiu ji'jmeeçxawa Dxusa's ũusuh jxuka yajkxna nwẽese'pha'ga yuuwemée ewsa yuuçxa Dxus Espiritu's jxpa'gawa'jsa yuu. Txã'wẽ yuuwa'ja'sku Dxusa' Abrahan yakh puutx we'we txã' kxtey yuuk.

¹⁵ Yakhthẽ'jwe'sx, na'wẽ yũuni's miijajkxwe: Kwe'sxa' kĩh yũuya' puutx we'weçxawa txã'sa' peçxkanamée kxtey yuuya' jxuka eçte fxi'çxa peekx yase's ki'pçxak ya'nvxiitu'. Aça' txã'wẽ yũuni's kim yuhwa ĩsxiini' jĩya' aja'çmeeta', sa' yu'pthejxa'wa aja'çmeeta'. ¹⁶ Txã'wẽy Dxuswa Abrahan yakh ew puutx we'weçxa nvxiitni's kim yuhwa yu'pthejxa' ajameetxna vxite' Abrahan ji'j yakh puutx we'weni's. (Dxus we'weçxa': lidx ji'jwe'sx jĩ'çme', naasáa teeçxçxáak kx-susu': lidx ji'j jĩnaçxáa. Txãa yu' Kristo's we'weçxak txã'jĩ'.) ¹⁷ Na'jĩ'th na': Dxusa' ũswa'ja's kxtey yuuya' Abrahan yakh ewku puutx we'weçxa neeyũu, aça' txãa puutx we'weni kuartocientos treinta anxu skhẽwnijũk Moises leya' kasehna ũsu'. Naa pa'ga txãa leya' Dxus ew puutx we'weçxa nvxiitni's yu'pthejxa' ajawa'jsame', e'su kasehsa' naa pa'ga. ¹⁸ Moises leypa'ga ewte neeyũuwa'ja's jxpa'gawa'jsawaça', dxiikhẽy Dxus puutx we'weni' selpiwa'jmée ne' yu'. Nawa txã'wẽ yũumée, ewte neeyũuwa'ja's

Dxusa' Abrahan yakh ew puutx we'weçxa neeyũuk txã' Moises leypa'gaméek jxpa'gawa'j yu'.

Leya' na'wěçxáa yuusa'

¹⁹ Txã'wěte', Moises leya' ĵkĩhtega selpi'? Ewmée yũuna fxi'zepa'ga yu'kxpehna fxi'jçxa nvxiitnisaçxáak yu'. Sa' Dxus Abrahan yakh puutx we'weçxa': Iidx ji'j ĵík txãa pa'phkaçxçxáak txãa leya' jxkaahwa'jsa yu'. Txãa leya's fxi'jçxa nvxiit-sa yu' Dxus angeleswe'sxçxáatx yu', aça' Moisesku jxpa'gaçxa jweeju yu' nasatx kaapiya'j. ²⁰ Nawa ewte neeyũuwa'ja's Dxus puutx we'wek txã'sa' angeleswe'sx jxpa'gaçxa peena Abrahana's ũsmeeta'. Txã'wě yũumée, Dxus yuuk txajx yuweju ewte neeyũuwa'ja's puutx we'we.

²¹ Txã'jĩte', Moises ley yakh Dxus puutx we'wenisa yakha' utxaaya' ājawa'jsamée iipuiisatxna sũjuwá'kwe. Txã'wěsameeta'. Aça' ley txã'wě ewte neeyũuwa'ja's ũsya' ājawa'jsawaça', leya's nwěese'jsa yu' jxuka ewte yã'j ũs yu'nja'w. ²² Nawa txã'wěmeete íik leyíi we'weçxawa: Jxukaysa pkalte yuuçxáa ũsta' jĩ'. Txãa pa'ga Jesukristo's ũusuh jxuka yajkxçxa yuuçxáa kwe'sx ewte neeyũuwa'ja's Dxus puutx we'wek txã'sa' jxpa'gawa'jsatha'w.

²³ Txã'jĩte', Moises leya' Dxus puutx we'weni's açasana sũjuwá'kwe. Weh yuhwa açasame'. Wejx yuuwa leya' kwe'sxtxi jxaawna ũssak yu' Jesukristo's ũuste jxpa'gaçxa ewte neeyũukahn. ²⁴ Leya' naasáa Kristo kĩhpkçaçx kwe'sxtxi jxpe'jsaçxáak yu', kxah Kristo kĩhte', txã'sa' ũuste jxpa'gaçxa' yuuwemée ewte

neeyũuwa'ja's ji'phukahñ. ²⁵ ãÇxha' Kristo's ũuste jxpa'gawa'j en ãjk, aça' txãa ley kwe'sxtxi jxpe'jsa's peena yu' yaakxwa'j ji'phmeetha'w.

²⁶ Txãa pa'ga i'kwe'sxa' Kristo's ũusuh jxuka yajkçxa nwẽese'pha'gaçxãa Dxus luuçx yuui'kwe. ²⁷ I'kwe'sx jxukaysa Kristo yakh fxi'zeya' sũhçxa yu'te ya'bautisãysa' txajx kusete jxpe'jni ũsi'kwe. ²⁸ ãÇxha' maa yuhwa puutx iiwejçx yaakxwa'jme'. Judiu ma'k yuu meeçxa' judiumée ma'k yuu, patron ji'phsa ma'k yuu meeçxa' patron ji'phmeesa ma'k yuu, piçthẽ'j ma'k yuu meeçxa' u'y ma'k yuu nawa maa yuhwa puutx iiwejçx yaakxwa'jme', txãa pa'gatey Kristo Jesus yakh fxi'zesa' maa yuhwa thaakwemée jxukaysa puutx txãa na'wẽçxaçxãa i'kwe. ²⁹ I'kwe'sxa' Kristo's jxpa'gasaçxa', Abrahaman ji'jçxa txã'wẽ yuune'kwe, sa' ewte neeyũuwa'ja's puutx we'wek txã'sa' jxpa'gawa'jsai'kwe.

4

¹ ãÇxha' na'sna mjiyuwe: Luuçxa' ney uute', le'çxkuẽy yu' vxite thẽ'jsa kusetek jxpe'jni fxi'ze' walaaçxa yu', ney nvxiitni's jxuka txãaçxaçxãa jxpa'gawa'jsaçxawa. ² Aça' le'çxkuẽy yu' thẽ'jsatx thegna jxpe'je', makwe txaçxpkaçx ne' neya' neewe'weçxa thẽ'jsa kusete jxpe'khan nvx-iht txãa en ãhpkaçx. ³ Kwe'sxwa txã'wẽysatha'w yu'. Luuçxwa ma'wẽga le'çxkuẽy yu' thẽ'jsa jxpe'jni fxi'ze', txã'wẽytha'w nyafxii yu' ley jxkaahni txajx kusete fxi'zema ũsu'. ⁴ Nawa makwe txaçxpkaçx ne'tka'w jxpe'jni fxi'zewa'jsa yu' txãa en pçuute', Dxusa' txajx Nçxi'ka's

kaakh, teeçx u'y kakwete kasehçxa judiuwe'sx na'wěy leya's nwěese'jwa'jsa. ⁵ Aça' kwe'sxa' ley jxpe'jni ũstewa, txā'wě yũuçxak txāajũ kutxi'jçxa Dxus luuçx yuuwa'ja's ũs. ⁶ Txāa pa'ga i'kwe Dxus luuçx yuuna pa'j, aça' Dxusa' txajx Espiritu's i'kwe'sx ũuste kaakh, āçxha' Dxus luuçxtha'w sũhwa'ja's ji'phukahñ. Txajk Dxus Espiritu' i'kwe'sx ũuste kaaũusuthe'je' Dxusa' kwe'sx Tata' sũhwa'ja's. ⁷ Txāa pa'ga āçxha' i'kwe'sxa' ley jxpe'jnismée, Dxus luuçxi'kwe. Aça' txajx luuçx yuupa'ga Dxusa' txāa jĩ's kĩhnawa jxuka i'kwe'sx jĩiçxaçxāa nvxiituna Kristo nwe'wepa'ga.

Ley jxkaahnite ki' sxawedsatx yu'kxpehni

⁸ I'kwe'sxa' nyafxii yu' Dxusa's jiimeeçxa', Dxusmeeçxáatx i'kwe selpiina fxi'zesa yu'. ⁹ Nawa āçxha' Dxusa's jiisa yā'ji'kwe meeçxawa Dxusa' i'kwe'sxtxi jiia' aça' çkĩjxa'çxāa ki' sxaweduki'kwe piçthē'jwe'sx kaapiya'jni açxamée seelpisate fxi'zeya'? ¹⁰ Txā'wě Dxusa's jiiyā'jçxa', ley jxkaahni entxi ki'sna, a'tetxwa ki'sna, anxutxwa ki'sna nwěese'jwa'j ji'phmeei'kwe. ¹¹ Txāa pa'gath txā'wě yũuçte uyçxa wala yaaki': Kxulçxāa wá'ntka i'kwe'sxtxi kaapiya'j sũhna.

¹² Txāasath yakthē'jwe'sxtxi neewe'we', adxwa ma'wětkā ley kaapiya'jni's jxuka nvxihtçxa i'kwe'sx na'wěy ley jxkaahnimée fxi'zena ũsu' txā'wěy yuukahñ. ¹³ Txā'wě adxa' kxtee uuya' ũsçxa', i'kwe'sxtxi nyafxçxah Dxus yuwe's pta'sxte', ¹⁴ āça'na ũstewa ahçemée wejxwa Dxus angel meeçxawa Jesukristo

thasi'kwe weçxana jxpa'ga adxa's. ¹⁵ Nawa txagaçxtey wēt weçxana yaakxnisa' çmteega yuu? Na'jĩ'th na': Txagaçxhíi yu' adxna peeygãaweeteçxáa i'kwe'sx yafxtxi kutxi'jçxa adxna ũsya' ājawaça', txã'wē yūuwa'jne'kwe yu'. ¹⁶ Nawa āçxha' isasa's pta'sxsa yu's açesa na'wē yuuna ũsi'kwe adxa's.

¹⁷ Kxsū i'kwe'sxtxi kaapiya'jsawe'sxa' i'kwe'sxtxi txãawe'sx ju'gutx tuphi jxthāasu'. Nawa ew yajkxçxa txã'wē yu'çmeeta', naasáa adx kaapiya'jniñũ txude wēçxaçxáa txã'wē yūuna ũsta', i'kwe'sxa' txãawe'sx yakh u'khan.

¹⁸ Txã'wē vxitesatx peekx ju'gu tuphywa'j yuja', nawa bagaçxtewa ew yūuwa'jçxá's yajkxçxa txã'wē yūuwa'ja', sa' adx kxtee i'kwe'sx yakh ih ũsteçxáa txã'wē ew yūusáa na'wē fxi'zewa'jme'.

¹⁹ Luuçxwe'sx, adxa' i'kwe'sx txã'wē yūupa'ga iiméh wala akate nxusna ũsthu, u'y nasate yaakasáa na'wē. Sa' nxusna nes yu'nja i'kwe'sxa' Kristo na'wēy fxi'zeya' ājapkaçx.

²⁰ Adxa' āçxhíith kxtee i'kwe'sx yakh ũs wēje', i'kwe'sx jxpubana yaakxni's yu'pthejxa'. Nawa jiimeeth i'kwe'sxtxi ma'wē pu'çxwa'ja'swa.

Sara Agar yakh kaaja'da'jni

²¹ I'kwe'sxa' ewte neeyūuya' sūhçxa' Moises leya's i'kwe yaaki', sa' txāa leya' na'wēsaçxá' txã'sa' jiyu'çmeewá'kwe. ²² Txã'sa' jiyukahn na'wē fxi'jni ũsa' Dxus libroute: Abrahamana' e'z luuçxku ji'phu jĩ'k. Teeçxsa' peekx nyu-utewe'sxmée, yatte selpisáa u'ytewe'sxku yu',

aça' vxite nçxi'ka' peekx nyuutewe'sxku yu'. ²³ Aça' yatte selpisaate kasehsa' kīhwa meesa

peekx vxyaasaçxáak yu'. Nawa peekx nyuute kasehsa' na'wē Dxusa' Abrahan yakh puutx we'weçxa': Luuçx ji'phune'kwe jík txáak yu'.²⁴ Txāa e'z u'ya' na'wēsata': Na'wē Dxus e'zsa yakh puutx we'wek Abrahan vxite' Moises yakh txāata' txāa e'z u'ysa'. Dxus puutx we'weni teeçxsa' Sinaí vxiç walatek yuu, aça' kxtee puutx we'weni' Agarwa ma'wēga vxitee jxkaahni selpiina fxi'ze txā'wēsa'. Txāasa íitx txāa puutx we'wenijū upxsa' ley jxkaahnitx selpiina fxi'zeyā' kaseje'.²⁵ Agara' Arabia kiwesu Sinaí vxiç wala na'wēsa'; txā'wēy naa ensu Jerusalen ūsa' txāawa txāa Sinaí na'wēysa'. Txajíiçxāa txāa çxhabte ūssa judiuwe'sxa' vxitee kusete jxkaahnisawe'sxta'.²⁶ Naapkaçxha' cielute Jerusalen çxhabtewe'sxa' vxitee jxkaahni fxi'zesameeta'. Kwe'sxa' kxteewe'sxtha'w thaakwesa.²⁷ Txā'sna we'weçxak Dxus librute na'jī':

U'y nasa ji'phuwa'jmeesaçxawa, nxusmēe wēt miiyajkxwe.

Weçxana sus mwe'wewe, nasate yaakani's jimeeçxawa.

Txāa pa'gatey luuçx ji'phuwa'jmeesaçxawa, Luuçx ji'phuwa'jsate jxthaakwe luuçx ji'phuna jī'k.

²⁸ Yakhthē'jwe'sx, kwe'sxa' Dxus puutx we'weçxa': Luuçx ji'phune'kwe jík txāatewe'sxtha'w Isaak na'wēsa.²⁹ Txāa entewa ma'wēga selpiina fxi'zesa luuçxa' Dxus puutx we'wenite kasehsa luuçxa's aççena kiite, açxhwa txā'wēyçxāa yūuna ūsta'.³⁰ Txāa ente txā'wē aççepa'gak na'wē yūuni's Dxus librute pta'sxi': Txāa u'y selpisa's pçxi'k íitx mkuutxi'j.

Txã'wěme' selpisáa nçxi'ka' peekx nyuute nçxi'k yakh ja'daçxah jxpa'gaya' ãjameena ney nvxiitni's jĩ'k. ³¹ Nawa kwe'sxa' selpisáa nçxi'k na'wēsameetha'w, wejxwa nyuute nçxi'k na'wēsatha'w.

5

Ley jxkaahnimée fxi'zeni

¹ Kristo' ley jxkaahnijũ txuhdek, kwe'sxa' ley jxkaahni fxi'zekahmen. Aça' i'kwe'sxa' ewte pa'jyã'jçxa', peena yu' utxaanuwe ley jxkaahni's nwēese'jya'.

² Ew mjiyuwe: Adxa' na'jĩ'th na', i'kwe'sxa' cirkunciona's jxpa'gawá'kwe aça' ley jxkaahnijũ Kristo nwe'wek txã' kxul yuuna. ³ Ki' kaayaki'jiçthu: Maa piçthē'jwa ya'cirkuncidāy yã'jçxa', txã'sçxáana jxpa'gamée, Moises leya's jxuka nwēese'jwa'j ji'phta'. ⁴ Leya's jxuka kxtey nwēese'jçxa yuuçxáa yuuwemée ewte neeyũ'nja sũhna yaakxsa', Kristo tasxu txutesáa yuune'kwe, sa' Dxus peeygāanijũwa txutesáa yuune'kwe. ⁵ Nawa kwe'sxa' Kristo's ũsuh yuuçxáa jxuka yaakxwa'ja's Dxus Espiritu pu'çxte', txã'wě yũuçxaçxáa yuuwemée ewsatha'w yuu. ⁶ Txãa pa'gatey Kristo Jesus yakh fxi'zesa yakha' cirkuncidāyni ma'k yuu cirkuncidāynimée ma'k yuu nawa txã'wěsa' peejxme', naasáa Kristo's ũuste jxpa'ganiçxáa txã'wě', txãa pa'gatey Kristo's ũuste jxpa'ganijũ' peeygāawa'ja's ya'ji'phu'k naa pa'ga.

⁷ I'kwe'sxa' ew yã'ji'kwe fxi'zena ũs yu', aça' çkimga nwēese'khamen kaypuba'jna

pa'j? ⁸ I'kwe'sxtxi kaypuba'jna pa'jsa' Dxus kaahnisa yu'çmeeta'. ⁹ Txãa pa'ga mpa'yajkxwe. Txã'wēme', lewadura' le'çkuēeçxawa jxukak pēetheje' skuutxh ũ'we makwetewa. ¹⁰ Txã'wētewa i'kwe'sxa' txakwe yu' jxpubakahmen Kristo' pejka pu'çxhina sūju'th. Nawa Dxusa' seena' yuh kastigaīna kaypuba'jsa's kintewa.

¹¹ Yakhthē'jwe'sx, miiyajkxwe: Adxa' txã'wē cirkuncidāywa'ja's kaapiya'jwaça', judiuwe'sxa' adxa's ahçemeetxna. Txã'wē yuuwaç yu', Kristo' nwe'weya' kluuskhē uuk jīna pta'sxnisa' kaaūsçxa'jmeena judiuwe'sxtxi'. ¹² Nawa txã'wē i'kwe'sxtxi kaacirkuncidaī'j wēena kuçx yuuna fxi'zesa' peekx kakwetewe'sxa's tee jwed jxuka ya'spē'thwaça', jiyutxna sūju'th adxa'.

¹³ I'kwe'sxtxi' cirkuncidāykahmenī ley jxkaahnijū nwe'wenisa yā'ji'kwe yuu. Nawa txã'jīte', açxha' leya' we'wewa'j ji'phmeena sūhçxa peekx ma'wēwa ewmēe yūuna fxi'zewa'jme', wejxwa vxitetx peeygāhna puutx ya'selpiina fxi'zewa'ja'. ¹⁴ Txãa pa'gatey leya' txã'wē yūuwa'ja'síçxáak wejx thaakwe neewe'we' na'jīna: Peekī ma'wēga ya'peeygāja', txã'wēy mpeeygāh maatxwa jī'k. ¹⁵ Nawa txã'wē yūumēe puutx puiina yahçena fxi'zesa' jxuka ja'daçxah puutx pçuune'kwe jxpa'yakxmeeçxa'.

Kwe'sx ũus yaakxni vxite' Dxus Espiritu kaaūsuthe'jni

¹⁶ Txã'wē yūuwe'sxte na'wē yūuwa'ja'sthu pta'sxi': Dxus Espiritu ew kaaūsuthe'jniçxá's kxtey yuuna mfxi'zewe, peekx ũusuhçxáa

yaakxni's kxtey yuuya'mée. ¹⁷ Txã'wěme', kwe'sx ũusuhçxáa yaakxnisa' pejka yuh ewmeesa'sku yaaki'. Txãa pa'ga Dxus Espiritu' kwe'sx ũus yaakxni's jxpa'ga'çme', naapkaçxha' kwe'sx ũus yaakxni' Dxus Espiritu's yupu'k. Txãa pa'ga ne'kwe pejka yuh ewmeesaçxá's kxtey yu'. ¹⁸ Nawa Dxus Espiritu i'kwe'sx ũuste jxkaahna ũste', jxpubana ley jxkaahnite fxi'zewa'jsameei'kwe.

¹⁹ Dxus Espiritu kaaũusuthe'jnimée peekx ũusuhçxáa yaakxnisa' naata': ptamumée pkal yuuni, ptamsaçxawa vxitesa yakh pkal yuuni, ma'wěwa kazx pkal yuuni, ²⁰ dxus itximeesatx neewe'weni, dxijxuuni, ahçena fxi'zeni, pui-
ini, ipxãani, ũusçxani, puiiwa'ja's ma'wěwa yũuna pakwení, pkhaakhesa yakhthê'jwe'sx puutx puiiçxa txutení, ²¹ vxitesa ji'phunitx açeni, nasa ikhni, tũuna fxi'zeni, tũusáa pwe'sx ma'wěwa kazx yuuni, pkal ma'wěsawa ũsta' txãatx kxtey yuuni. Txã'wě yũusatxi' adxa' áate pta'sxiçthu: Txãawe'sxa' Dxus jxkaahna ũsnite u'kawa'jsameeta'. Txã'sa' nyafxíiwa pta'sx yã'th.

²² ãçxha' Dxus Espiritu kaaũusuthe'jni' naata': peeygãani, weçx weçxa fxi'zeni, ũuste ewçxáa yaakxni, ũusçxa yajkxmée fxi'zeni, maatxwa peeygãhna fxi'zeni, vxitesatx pu'çxna fxi'zeni, wa'lmée nwěese'jna fxi'zeni, ²³ iiwejçx ya-jkxmée fxi'zeni, ũuste ewmée ũusutheni's nwěese'jmée fxi'zeni. Txã'wě ew yã'j fxi'zesa's leya' thegwa'j ji'phme'. ²⁴ Kristo nasa yã'ja', peekx ũus yaakxni ewmeesa's kxtey yuuna fxi'zewa'j ji'phmeeta'.

25 Dxus Espiritu txã'wẽ ew fxi'zewa'ja's ũste', txãa yakh yuuçxáa fxi'zewa'j ji'ptha'w nwẽese'jna. 26 Iiwejçx yajkxna puutx puina ahçena fxi'zewa'j ji'phmeetha'w.

6

Puutx pu'çxna fxi'zeni

1 Yakhthẽ'jwe'sxtxi neewe'we'th: Maa yakhthẽ'jwa ãhmée yũuni's jiyuçxa', txã'sa' myu'kxpehwe, i'kwe'sxa' Dxus yakh çxhãçxha yã'j fxi'zesai'kwe naa pa'ga. Nawa wala jxpa'yakx weeçx we'wemée myu'kxpehwe. Txã'wẽme' i'kwe'sxtxiwa wetewa'j en pa'jawáana. 2 Teeçxsa na'wẽçxah puutx ya'mpu'çxwe thẽyte fxi'zeni's. Txã'wẽ yũuçxa Kristo jxkaahni's kxtey yuusáa yuune'kwe.

3 Kĩhtewa jwee yu' thaakwe ewsameeçxa txã'wẽ iiwejçx yajkçxaxa', ãsxiisa yuuna.

4 Txãa pa'ga peekx fxi'zeni's khuẽ'y yaakxwa'j ji'pha' ¿ma'wẽsaki'th? sũhna. Txã'wẽ peekx fxi'zeni ewtewa jiyuçxa, wẽtwẽt yaakxwa'ja', nawa vxitesa fxi'zeni's weeçxwa'j ji'phme'.

5 Teeçxsa na'wẽçxah peekx fxi'zeniçxá's wala jxpa'yakxwa'ja'.

6 Kristo jxkaahni's kxtey yuuna kaapiya'jsa's pu'çxwa'j ji'pha' peekx ji'phuni kĩh yakhçxáawa.

7 I'kwe'sxa' ya'jypubanuwe naa sũhna: Kĩhwa yũutewa, Dxusa' txakwe yu' jiyumeena sũhna. Dxusa's kim yuhwa txã'wẽ yu' yajkxna weeçxmeena. I'kwe'sx kĩh yũuçxawa txã'wẽysaiçxáa jxpa'gane'kwe. 8 Meeçxawa peekx ũus yaakxni ewmeesaçxá's kxtey yuusa',

uuwa'ja'sçxáa ji'phuna txã'wě yūupa'ga. Nawa Dxus Espiritu kaaūsuthe'jni's kxtey yuusa' багаçxte yuhwa pçumée ĩtxi fxi'zewa'ja's ji'phuna. ⁹ Txãa pa'ga ew yūuwa'jçxá's wahtxmée kxtey yuuna fxi'zewa'j ji'ptha'w. Txã'wě ew yūuwa'ja's wa'lmée kxtey yuuna ũsçxa', ewsa's jxpa'gawa'j en ähte', jxpa'ga'nja'w. ¹⁰ Txãasa ma'wěn entewa vxitetx ew yūunaçxáa fxi'zewa'j ji'ptha'w, sa' Dxus yakh fxi'zesa kwe'sx yakhthě'jwe'sx yuutxi' wejx txã'wě ew yūuwa'j ji'ptha'w.

Peekx kakwetewe'sxa's yajkxmée Kristoçxá's weçxani

¹¹ Mthegwe, adx kuseju yuu ew äate fxi'jaçthu, i'kwe'sx jiyukahn. ¹² Kristo kluuste uuni's pta'sxpa'ga yaaçeni fxi'ze wēmeeçxaçxáa, txã'wě i'kwe'sxtxi' kaacirkuncidaĩ'j wēena ũsta'. ¹³ Txãawe'sxa' makwe ya'cirkuncidäyçxawa, ley jxkaahni's jxuka yu' kxtey yu'çmeeta'. Nawa i'kwe'sx yuutxi' cirkuncidäykaja'tx, txã'wě kaacirkuncidaĩ'tha'w sūhna weeçx weeçx yaakx wēeçxatx txã'wě yu'. ¹⁴ Nawa adxa' kīh yuhnawa weeçx weeçx yaakx wēemeeth, naasáa kwe'sxtxi' jxpe'jsa Jesukristo kluuste uuni' yuuçxáak adx ũuste wēt wēt kaaūsuthe'je'. Kristo kluuste uupa'ga adx yakha' naa kakwetewe'sxa' seelpisame'. Txãasa adxa' naa kakwetewe'sxa's nwēese'j wēemeeth, uusáa na'wě. ¹⁵ Txãa pa'gatey Kristo Jesus yakh fxi'zesa yakha' cirkuncidäyni ma'k yuu meeçxa' cirkuncidäynimée ma'k yuu nawa txã' kīhwa meesa', naasáa ewmée ũus yaakxni's

yu'pthehçxa fxi'zenisaçxáa seelpisa'. ¹⁶ Na'wēth jxkaaja' txã'sa' kxtey yuuna fxi'zesa' Dxus peeygãani ew fxi'zewa'ja's jxpa'gatxna Dxus luuçx jxukaysawe'sx.

¹⁷ ãçxha' naajũ' peena yu' kimwa kuçx yuuni peejxmeeth. Kuçx yuukahmeníi adxa' Jesusa's selpisaath, txãa pa'ga pkxuuni kakwete snxal ji'pthu.

¹⁸ Yakhthẽ'jwe'sx, kwe'sxtxi jxpe'jsa Jesukristo' i'kwe'sx jxukaysatx pu'vxitumée pu'çxhina.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd